

Mál nr 2/2016

Ár 2016, þriðjudaginn 26. apríl, var haldinn fundur í siðanefnd HRFÍ að Síðumúla 15, Reykjavík

Fyrir var tekið mál nr.2/2016

X

gegn

Z

og kveðinn upp svohljóðandi úrskurður:

I. Málsmeðferð siðanefndar.

Í erindi kæranda (X) sem barst siðanefnd 25. nóvember 2015 er farið fram á úrskurð siðanefndar vegna þess að kærði (Z) hafi gerst brotlegur við grundvallarreglur fyrir félagsmenn í HRFÍ með því að para rakkann ZZ við tíkina WW án þess að rakkinn væri með gilt hjartavottorð við pörun. Kæran var send kærða til umsagnar með bréfi dagsettu 17. mars 2016 og honum gefinn frestur 14. apríl til að skila inn andmælum. Svar dagsett 22. mars barst og var afrit af því sent kæranda til umsagnar. Kærandi svaraði ekki efnislega en það um að haldið yrði áfram með málið. Siðanefnd taldi að öll gögn er máli skiptu væru fram komin og ákvað að taka málið til úrskurðar byggt á fyrirliggjandi gögnum.

II. Helstu málsatvik og ágreiningsefni.

Samkvæmt innsendu pörunarvottorði ódagsettu var rakkinn ZZ paraður við tíkina WW hinn 11. ágúst 2015 án þess að rakkinn væri með gilt hjartavottorð. Hundarnir eru af hundakyninu Cavalier King Charles Spaniel og er rakkinn í eigu kærða. Kærandi telur að með pöruninni hafi kærði gerst brotlegur við grundvallarreglur fyrir félagsmenn í HRFÍ. Í svari frá kæranda kom fram að hann hefði talið að rakkinn væri kominn á þann aldur að hann þyrfti aðeins árlega skoðun. Það voru mistök, og hefur nú verið farið með rakkann í skoðun þar sem hann reyndist heill og án murr.

III. Forsendur.

Samkvæmt grundvallarreglum fyrir félagsmenn í HRFÍ skulu félagsmenn er nota hunda sína til ræktunar vera trúir ræktunarstefnu HRFÍ og vera vel að sér um það ræktunarmarkmið sem gildir fyrir viðkomandi hundakyn og í reglugerð um skráningu í ættbók, reglur sérdeilda varðandi undaneldisdýr segir um hundakynið Cavalier King Charles Spaniel:

„Vottorð undaneldishunda yngri en 5 ára má ekki vera eldra en 6 mánaða við pörun og skulu þeir vera án hjartamurrs. Vottorð eftir að 5 ára aldri er náð gildir í eitt ár. Hunda sem hafa hreint hjartavottorð tekið eftir 6 ára aldur, má nota áfram þó þeir greinist með murr síðar. Vottorð tekið eftir 7 ára aldur undaneldishunda gildir ævilangt. Afkvæmi hunda sem greinast með murr fyrir 4ra ára aldur fara í ræktunarbann. Til að vottorð sé gilt þarf að nota eyðublöð frá HRFÍ. Hjartavottorð þarf að fylgja ættbókarskráningu og niðurstaða kunn fyrir pörun. Einungis eru tekin gild vottorð fagdýralækna sem hlotið hafa þjálfun í að greina hjartamurr hjá hjartasérfræðingi. (Gildir frá 1.6.2015)

Óumdeilt er að á þeim tíma sem pörunin átti sér stað var rakkinn ekki með gilt hjartavottorð. Hjartavottorðið er eitt þeirra vottorða sem áskilin eru um heilsufarsskoðun hundakynsins og mikilvægt að það liggi fyrir við pörun til þess að tryggt sé að hundurinn beri ekki með sér arfgengan sjúkdóm. Rakkinn hefur nú verið skoðaður og til allra heilla reyndist hann heilbrigður og án murr. Það breytir þó ekki brotinu að rakkinn hafi staðist skoðun eftir, það var ekki fyrirséð.

Kærði hefur ekki áður svo vitað sé gerst brotlegur við reglur félagsins og er það mat siðanefndar að veita skuli áminningu.

IV. Niðurstaða

Kærði Z telst hafa gerst brotlegur við grein 2.6 í grundvallarreglum fyrir félagsmenn í HRFÍ

Kærði er áminntur

f.h. siðanefndar

Anna María Flygenring

Guðríður Þorbjörg Valgeirsdóttir

Kristín Sveinbjarnardóttir